

晚晴移詩匯

晚晴簃詩匯卷一百九十二目錄

閨秀

曾懿 二十三首

曾彥 二十五首

嚴蘅 八首

孫芳祖 四首

繆寶娟 十六首

慕昌雉 五十一首

謝佩珊 一首

謝漱馨 一首

蕭道管 十七首

姚倚雲 五首

聶炳相 一首

吳怡 九首

王嗣暉 十八首

史濟莊 四首

楊延年 六首

姚素榆 十二首

姚倩 十一首

陳麗芳 一首

張元默 十四首

玉并 六首

晚晴移詩匯卷一百九十二

閨秀

徐世昌

曾懿字伯淵一字朗秋華陽人太僕卿詠女宛平光緒

己卯舉人湖南提法使袁學昌室有古歡室詩詞集

詩話伯淵善詩詞工書畫書專篆隸畫專山水並以丹青運於絲繡精細入微歸幼安提法同好金石蒐集漢隸各碑斷夕校勘書法益進詩詞外著有醫學篇女學篇中饋錄俱有神實用相夫教子後起多才繆藝風序古歡室集謂以冷雲爲母以紅蕉爲姑以蜀璋季碩爲弟妹家學淵源流傳有緒又稱其敝佩相莊蘭玉競爽古今才媛不可得之遇以一身兼之而齒軼稀齡名登史傳藝風猶未及見也

魏小蘭姊邀游桂湖謁謝公遺像

湖上隨肩步春游景物鮮露花紅蘸水絲柳綠搓煙徑曲
疑無路山迴別有天空亭聊小憩把盞聽流泉

軒窗開四面陡覺薄寒侵桂樹連城暗松濤壓殿陰山川

東坡全集卷之二十一
餘霸氣風雨壯詩心謁罷謝公象愴然感古今

浣花詩社歌

浣花溪水何洋洋繞溪珍木鬱蒼蒼樓閣敞流各低昂湘
簾十二捲夕陽中有詩人情且揚芝蘭競秀雁成行明月
爲裾雲爲裳高談妙語翰墨香依依夢鎖春草堂筆花燦
爛生輝光麗句爭傳碧琳瑯浣溪風月富錦囊松篁敲韻
入瀟湘波光雲影皆文章染墨綺靡不可忘詩情遙共海
天長詩萬卷酒千觴吟詠之樂樂未央但願人生歡聚永
無荒千秋萬歲合與騷人共草堂

蓮花曲

水榭簾櫳人如玉鳴橈軋軋春波綠昨宵酒醉各題詩今
朝都賦蓮花曲粉痕欲墜紅妝淺清露如珠垂欲散翠潏

清風蕩融融參差綠影雲塘滿蓮子花開水檻東重疊掩
映鮫綃紅秋羅拂水水紋縐香飄四座生荷風碧塘搖盪
多芳草白蘋斷處生紅蓼紫鱗水面吸蓮花池邊日日來
青鳥遙遙柳絲鎖湘煙蓮根蓮葉相鉤連素藕絲柔情不
斷露珠搖蕩非真圓銀浪金光蕩曉日綠蕖半掩桃花色
簾波隔水夏雲生千里輕風總無力杜宇嗁殘春已歸交
交鷓鴣芳塘飛愁煞江干采蓮女輕風吹香香著衣青絲
繫船茱萸灣重開新筵不忍還侍女低鬟進美酒坐中酒
後皆紅顏月明滿地遙相望魚戲蓮葉吸細浪佩環初解
舞衣輕荷葉羅裙色一棹歸來玉婢捧花蕊采蓮夜夜得
蓮子一身花露溼雲衣回首胭脂紅十里

秋夜

螢火依人點點飛輕寒料峭不勝衣紙窗月上玲瓏影畫
譜新添墨紫薇

流雲捲月鏡開圓閒詠新歌昔昔鹽秋興撩人眠不得時
聞蕉葉打虛檐

送孟昭大姊歸新都同游桂湖時值中秋桂花正開
秋風一夜來桂湖天香馥郁飄雲衢虹橋跨水水飛動湖
光如練煙中鋪煙中詞客數來往三尺綠波搖畫舫雙槳
劃破碧琉璃白鷺驚飛時三兩半山偃蹇露華沍峭風吹
花浮水面游魚吸水并吸花樹影亦爲魚吞曠桂樹轉東
舟轉西樹梢直與城堞齊金粟飄香氣鬱蔥歸鴉如墨釀
霜噉桂葉冷雲蒼且碧斜陽穿樹紅於血花光黃暈真珊
瑚襯以粉牆成五色色映亭臺生輝光鳴篴深護清暉堂

闌干倒影池清淺，枯荷數柄留古香。記得去年嬉好春，芳
草如茵，鵲踏鞢塵。風光轉眼千萬變，人生聚散等浮萍。新詩
吟罷，酒頻傾，與君小別，心緒縈。不知明月幾時有，冰壺一
洗襟懷清。

憶梅曲和慈親韻寄仲儀三妹

霜滿檐牙蟾魄冷，碧梧飄盡凍金井。角聲吹斷隴頭雲，惆
悵江南芳意迴。曾記閒庭春夜春，月溫花暝人同影。一聲
長笛落紛紛，掃來葬向孤山頂。而今芳信天涯遠，人瘦如
花花不管。幾度巡檐幾度思，醉吟擊碎琉璃釵。昨宵夢入
羅浮裏，香霧朦朧迷芳芷。溪南溪北盡是花，一片香魂飛
不起。翠羽啾啾窗月白，栩栩仙夢酣成蝶。殘鐙一點可憐
紅，魂黯黯兮情脈脈。

園中海棠盛開招靜專從妹小飲

幾日春陰濃海棠睡已足和風灑然來花氣蒸入幕開簾
惜無香穠豔早奪目絳萼含蕙蕤清影顫撲簌宛如紅霞
紅不枉綠章綠容顏本無偶觀者苦多俗幸有故人來相
與訴衷曲握手談新詩開樽倒金谷對此良辰景惟有醉
醺醺君醉儻欲眠抱此花魂宿

病後憶季碩五妹

扶病舉帷步微吟養性真秋花閒似我新月瘦於人鍊藥
燒紅葉焚香倚綠筠不堪回首處離緒滿江津

五妹于歸江津學署

旋聞別親

生小依依骨肉親天涯忽已轉雕輪明知久聚愁言別故
作歡顏強對人燕寢何時承色笑鹿車從此歷風塵親心

更比兒心切隔夕先看淚滿巾

一曲驪歌百慮攢思親容易侍親難夔關雪冷魂先怯巫
峽雲深夢亦寒雁影無端重聚散魚書從此望平安臨歧
無限傷心淚忍到鴛鴦細細彈

舟過大佛巖

山頭一雨作膏沐洗出千重萬重綠林容燦爛江聲高古
剎莊嚴枕山麓繫纜凝碧灣石潤青苔斑斕乃一聲山谷
應千帆影落夕陽間仙人低鬟靜相對但覺撲面皆青煙
青煙飛不斷石磴石鏡互迴轉碑披蝌蚪奇樹種菩提滿
忽然萬壑奔驚雷青天倒掛銀河來飛流直下一千丈晴
雪滾滾晶簾開枯藤濃染赤龍血古楠迢遞作人立暗澗
風號虎氣腥深箐暮捲猿聲急前山嵌古亭後嶂開錦屏

扁丹一葉泛萍梗大江日夜無留停宛疑人在鏡中坐相
對共訝鬢眉青我今隨君掉客帆行程始至大佛巖明早
掛席東南去一片疏鐘送過山

舟過巫峽見十二峰高插霄漢神女峰尤爲纖麗峻
峭神女廟在山之巔

琅琅天風壯嵯峨十二峰飛雲翔婉變懸瀑響琤琮景富
詩偏迴愁多夢亦慵纖穠宋玉賦千古憶仙蹤
壁立雙峰合真成一綫天煙鬟浮翠黛霞彩媚華顛人語
隔山應江流急箭穿楚王今已渺神女爲誰妍

即景

梧桐庭院碧陰滿桐花香撲幽人館幽人養病意態慵罷
妝鏡掩青芙蓉迢迢長晝漏頻轉悄倚疏簾品茶筭一陣

涼風送雨來攪碎鑪煙和雲捲

英山道中

曉發仙人山山高風似虎月落東方明霧氣蒸成雨風捲
暝色開瞳瞳日初吐林麓噴彩霞朝陽散平楚偶聞雞犬
聲人家隱桑塢登高望八荒蒼天如覆釜杜鵑紅滿岡開
落無人主貪看山林景不覺征途苦茫茫塵世中何如鴛
鴦侶朝聚滄浪煙夕宿蓼花渚得失不關心翱翔時振羽

季碩五妹以詩見示題其卷後

人生處世苦局促惟有新詩可傲俗搖筆長吟天地寬放
懷何必爭榮辱吾家季妹詩最豪百篇揮灑才彌速哀豔
應教謝鮑驚蒼涼直使韓蘇伏長途千里歷風塵牢愁欲
效窮途哭閱歷因知世路艱翠袖單寒頻倚竹遨游湖海

月日集言四十一頁之二
衣化緇陶鑄江山字凝綠松壓嚴霜挺秀姿梅含古雪得
奇馥清烈如聞越石笳激昂疑聽漸離筑掃除俗豔與凡
音開卷琳琅先豁目憶昔故鄉聚首時推敲共翦西窗燭
裘葛回環踰十年吟囊早已盈千束自慚隨宦走皖江塵
海羈縻總庸碌披卷真同下里音揮毫難奏陽春曲今君
征棹赴姑蘇一路溪山詩料足酒酣落筆淩滄浪別緒惓
惓夢魂逐宛轉相思何處尋臨風遙指君山麓

九日登樓望迎江寺塔

斜陽明滅鴉對語白楊蕭蕭作風雨孤城寒甕大江聲一
塔巍然湧過城二龍山高高百仞恍若玉山遙相並人影
微茫落半空足底白雲送清磬

六安阻雨寄高蔓華如姊

敲篷一夜雨衾薄曉寒添千里舟車苦經旬愁病兼風濤
驚斷雁霧氣隱涼蟾秋水人何處離懷滿綠葦

舟行阻風雨雜書所見寄叔俊四妹壽州

驚濤捲長空氣勢來東北密雨拋散珠油雲張重幕琴書
頗繁重汊港復幽僻草深蛟蚋驕潮急魚蝦擲回波遲雙
棹暝色欺行客嗟我塵世勞言念保身哲遙睇景轉輶養
靜神逾寂指點來時路迷茫蘆花白

冬夜翫月偶見南園梅花微綻與外子尊酒賦此

鴛瓦粼粼霜似雪池冰堅結琉璃碧巢枝宿鳥凍無聲一
輪寒月東方出冰壺月曜澄清華沈寥天氣迷寒鴉眾卉
紛紛爭搖落惟有梅萼霜中花鐵骨冰膚呈綦縞苔階葉
落愁慵掃冷香菲菲暗襲予心迹雙清同懷抱春風二月

隨南征梅花如雪撲簾旌椒陵小住將一載贏得風霜兩袖清金貂換得梨花春寒梅香裏傾千尊醉後談詩詩愈巧披衣起舞挹星辰玉堂夜靜月逾皎碧天如磨青無雲不如且向酒中住與月爲友花爲鄰高談久坐燈花炮牆外傳來數聲柝霜氣浸空月欲斜詩魂冷共梅花宿

夏末秋初炎蒸未退病起無聊作此以示諸子

病起苦炎熇鬱紆意不適乘曉臨前軒冷冷蕉露滴苔蘚緣階綠敗葉掃還積昨夜西風來吹夢落天末眷念宦游子天涯互相隔章江波溶溶蜀山青突帆長歌行路難棧道歷冰雪兒行萬里遙母心隨征轍願兒志四方雲程奮六翮仲子依帝都聖恩美嘉節弱冠金閨彥辭親遠行役護輦去復回衣飄邊塵跡願兒儷璠璫匡君并輔國願兒

如陽春隨時布德澤靄靄出岫雲瞳瞳浴海日勉哉爲霖

雨努力同修德

時大兒楨宦江右二兒準供職京都三兒凱宦四川四兒贊親漢中六兒從學京都

曾彥字季碩華陽人太僕卿詠女漢州光緒甲午進士

改庶吉士大荔知縣張祥齡室有桐鳳集虔共室遺

集

詩話季碩爲詩抗心希古不願作唐以後語湘綺序其集云漢州張生祥齡爲禮堂都講時來討論同學多言其婦會明慧工詩畫往往爲詞翰置諸高材生卷中輒得高等余攜四女至蜀中其長者有標格略涉經史會因來見同學相約如兄弟時出詩歌質余益讀楚詞漢詩兼作篆隸十年來業術進退駸駸過其夫歿後子穉重刻遺集曲園稱其詩直而不野麗而有則不求纖密之巧自有宏肅之美子穉恆語人作詩媿遜吾婦故遁而爲詞則湘綺非謬言也

郊居新築溪流夾園喬木嬰鳴雜花春發

結構南山陽嘉木繞原隰况復值初春萬物皆芳澤園柳

發青柯山桃含丹實好鳥揚權聲幽禽展豐翼雖無華京
盛足以肆怡懌君子既高蹈諸姬亦樂職載理權相迎敦
義怨易釋既感朱綠施能不自彫飾

觀潮雨

曾颺搏朝雨清冷天半來始集璿鋪蕙末滌玉階苔紛糅
如累靄灑奕似織埃夙興振容儀重閨扃未開恬然絕塵
慮感古忽增哀戢羽思雲舉奮鱗慮波頽進退難專志素
絲戚中懷從欲詎能極終蹈箕山隈

游南池作

秋日縣清郊寒蟬改故音展懷游廣園悽惻發微吟池葉
隕情波叢菊媚高岑覽枯惜嘉卉睹茂悼殘林鬱與陶俱
集憐共愛相尋興衰各應節詎解起悲歆嗟彼窮達士胡

爲勞素心

秋夜月懷叔俊四姊

秋月流光薄淒淒上階苔階苔故人跡一一存我懷音容
渺不見情思應往來情思長相接無庸動息偕伊余素修
遠詎爲歲寒摧養痾忘悲悼寡欲鮮違乖況乃待君子禮
儀良不虧願言寄賞心戰勝靡所哀

泛湖登南山瞻眺

朝發南山陽夕息北江湄舍舟登原隰輟策步郊岐曾巖
旣明媚曲汜亦漣漪俛聆虛壑顙仰睇崇岡枝清泉漱積
石珍木列平陂高下竟何辨豐茂皆懽怡幽蘭發素采叢
桂含丹姿鮮鱗萃芳芷好鳥逐輕颺覽彼富春物眷戀感
予思豈惜違君子但傷莫我知操持信難固孤游良可悲

詠懷

獨坐苦無悰，攝衣登高臺。會廳從東發，悽愴入我懷。遙聆
叢悲積，遠矚百憂來。慙慙枯桑折，惻惻孤鴻飛。尋權彌起
思，爲樂更增哀。安得駕雲螭，逍遙游蓬萊。不辭道路遠，但
傷莫與偕。誰憐西顏日，復值野風吹。

答兄旭初定襄

鳳凰翔高岡，眾雛相追隨。一雛羽毛弱，不得與之俱。號泣
墮沙渚，索侶鳴聲悲。豈不戀骨肉，奈何雨雪霏。行行一反
顧，飛飛復遲迴。惻惻入雲漢，淒淒竟孤遺。饑烏繞我隰，繒
紆向我垂。傍徨失所依，空巢獨自歸。託身高梧中，常得露
華滋。饑不食，粳稻渴不飲，江湄韜精復潛聲。鴈鷗不我疑，
荏苒畜道義。六翮生光輝，當待風雲會。奮翅同來儀。

從子馥還漢州作

從君還舊邦仲春善游適
繇英綴柯條芳草被阡陌
華日動通津輕飈蕩豐麥
華宗申篤好耆艾敘疇昔
芳醪勤酬獻嘉肴充瑤席
達人隆德輝夫子繼宏績
高情屬華嶽抗志蹈雲霓
天姿美無度茂德難匹敵
明哲自有經賢達豈今識
嗟余菲薄質薦蘿翳松柏
永得親光儀偶懷共芳潔

答子馥

達人貴無憂智者多玩世
忘形與物齊損益焉足計
當榮不驕矜處苦豈憂懼
盛衰固表裏否泰信崇替
草木有榮枯取怨朔風厲
日月有明晦敢怨浮雲蔽
託身宇宙中霜露皆恩惠
神甯禮自舒欲止權來遇
翱翔游太清逍遙度年歲
偕時進德業崇禮期昌世
感君篤道義努力自勸勵

滯雨不發隔舟貽易玉俞

誰云相離遠咫尺江波中音容曠不達所託心與胸心胸
既默感漸別亦愁充矧乃過三朝何如九秋終理棹期夕
懽繫纜復分蹤嚶嚶鳴思鳥翩翩飛別鴻春雨潤蘭皋輕
煙媚遠峯纏綿懷茂德寤寐憶儀容豈無偕游覽溫仁誠
可從念彼性婉戀茲情應與同

蘇州七夕同子馥泛湖

客情眷佳節理棹泛江陰遙波澄夕霽霞彩媚楓林城闕
靄暮光長煙引嶂欹芳甸散蘭息高樹噪棲禽嚶嚶河漢
輝脈脈雙星臨眷戀隔年思嫵婉今夕心泠泠仙風過時
聞清吹音曾樓設華宴皎月墮芳斟明鑑粲飛閣列坐理
瑤琴纖纖素手彈淒淒白頭吟繁華當此夜歡樂輕千金

如何窮達士獨抱憂思深卽事感我懷慨然念古今悟彼
山阿人元默誠可欽

吳趨行

驚飈薄豐林夙夕成枯枝百草芳初興鸚鵡胡不遲哲人
期佐世愚者亦深思婉戀辭鄉邑翱翔吳江湄山川何溫
媚名都信威儀層臺通天漢飛宇貫雲霓峨峨閭門開藹
藹駟軒馳朱輪王侯女翠蓋尙書妻天治倡家子聯翩游
俠兒百兩嵌寶釧千金綴珠衣清濁不異源貴賤同一涯
踟躕大道傍邂逅通言辭入門不相識列坐傳金卮清歌
共酬唱和好無偏私夫壻居上頭顧盼矜妍姿日午眠重
闌深宵宴曲池華鐙蔽星月薰香燒蘭芝哀哉萊氏偶躬
耕蒙山基蒿蓬結爲室藜藿持作糜靡靡黍離歎縣縣葛

萬悲王風化難周人情多乖違聖心豈不懷此邦非吾資
潛龍有時升雄性誰能移

楊花篇

陽春三月清明天楊柳千條拂玉關玉關送別多淒苦況
復楊花飛無數飄泊初辭連理枝纏緜復上相思樹笙歌
暝響風日低煙草迷離驄馬嘶扶荔宮中鶯燕少披香殿
裏鷓鴣飛游絲有意欲牽住蛺蝶多情還自隨可憐游絲
空縈繞可憐蛺蝶空顛倒隨風吹入華清池化作浮萍覆
鴛鳥

玉階

玉階消積雪娟娟瀉瓊液春風昨更寒爲感江南客簷前
辛夷花高枝已爭發鮮姿復先榮婀娜誠可悅但恐微芳

衰颿風不收惜

通州舟次

姑蘇城邊春早來清溪處處春花開北風海外變蕭瑟黃
塵漠漠驅春回枯木無枝堆殘雪白鷗沙際蒼茫立頽陽
斂斂下西山船頭佇立愁將夕橫風吹波舟行艱舟人辛
苦生煩冤

舟中即景

帆影入蒼翠霞光散碧霄平沙人喚渡高樹鳥爭條古埃
消殘雪寒風生暮潮客情容易倦莫負月明宵

春風吹客思高詠滿山川落日疎森木孤帆貼暮天潮平
鷗夢穩江靜月光圓漫說征途苦深宵未忍眠

喜弟至

聞說遼西去相逢念已灰孰知天意厚不使我心摧
從君至愁當爲爾裁驚看嗟老病感慟且銜杯

飄泊誠堪歎飛蓬離本根艱危辭故邑高逸隱吳門
聞說芳蘭地都令野草繁何時賦歸去同醉少陵園

細雨簷花落華堂笑語融飛觴春酒緣分韻錦箋紅
各述平生志相憐離別衷此心非舊日愁損不玲瓏

自爾歸來日秋天景似春簷花垂繡戶明月墮華茵
鮮潔紅鱗膾香茸碧澗蕤酒闌談舊事一字一悲辛

前有一樽酒行寄慰子馥

前有樽酒休歎息請君展眉聽余說自古賢豪多坎坷
濟清河濁今誰識君不見相如滌器臨邛道不過良時亦潦
倒祇圖一割媿鉛刀敢云朝野知音少又不聞富貴尊榮

悲患多惟有貧賤可無他懷憂一國甘一肉何如陌上耕
桑麻空持科第稱奇才縱使成名亦可哀荆榛得地比松
柏蕙蘭不採同蒿萊莫言閨中無意氣蓬門投畚驚車騎
琉璃共酌且高歌書劍蒼茫動天地停杯惆悵緘此辭玉
階涼月縈相思儒生得失等閒事徒倚微吟風雨詩

贈蜀章三弟

芳草嚶嚶脊鴿語念我與爾隔重嶼便風傳緘慰相思爲
問才華今幾許三郎少小心獨雄紅顏如玉氣如龍盤馬
彎弓射明月修眉朗朗臨春風東鄰父老笑相指云是當
今天廟器驍躍不愧稱神駒英年果遂青雲志憶昔蘭閨
依慈親文歌琴酒圍錦茵當時懽樂不自足甯知一日西
南分西南東北長懷憶庭闈眷念誰遑息男兒有志繼先

賢女子無非勤酒食人生得意能幾回醇醪但醉休停杯
莫向風塵歎蕭瑟好憑經術聘奇才

立秋登樓觀雨

高閣滄浪側軒窗四面開晚風吹澗水空翠結庭槐飛鳥
歸林急蒼雲帶雨來碧梧一葉落涼意滿莓苔
旅客漫愁思何堪節候催暑從林際散秋自雨中來遠樹
輕煙合遙山夕瘴開野鷗歸已盡一鶴獨徘徊

嚴蘅字端卿仁和人錢塘陳元祿室有嫩想盒殘橐

詩話端卿工小詞嫺音律歿年未及三十有女世說
橐既歿其家得諸鍼綵篋中漫漶塗乙蓋未竟本嘉
善張彥雲與其詩詞
俱錄入媚鏡樓叢刻

侍子織姑游葛嶺小憩富春山館

畫船斜倚畫橋西結伴尋幽手共攜小港綠搖春水亂斷

碑紅出野花低賞心舊夢邀鶯語脫手新詩待燕齋閒拔
玉釵橫檻畔他時珍重記留題

題畫

遠山凝翠柳毵毵小閣分明鏡裏嵌三十六陂春水綠不
知何處是歸帆

連理梧桐館夜坐

風露中宵冷莓苔小院清花魂扶月上蟲語叫秋生身倦
便湘簾鬢低鞦玉箏碧天詩思遠情話欲初更

贈春聲閣主

乾坤清氣自嶙峋僥倖金闈窈窕身頗有蒼生歌哭想被
人錯喚作詩人

七夕和春聲閣韻

秋河如畫碧迢迢香冷雲屏夢寂寥花影低垂簾不捲人閒天上可憐宵

春聲閣主集西洲曲云海水搖空綠蓮心徹底紅繡山明經屬朱寶瑛夫人隸書寄自山左戲題斷句玉腕拈毫迥出塵蘭閨韻事劇清新陳琳畢竟輸朱淑不繡才人繡美人

蘇隄春泛

湖波窈窕鏡中天畫楫橫飛去似仙兩岸綠楊人不見曉鶯啼破一湖煙

皋園卽事

湘波無語畫愔愔倦夢如煙不可尋奇石瘦於名士骨落花紅過美人心隔簾燕影低窺鏡潤檻苔痕遠上琴不是

傷春情緒懶年時多病到而今

孫芳祖字心蘭號越晚會稽人知府道乾女山陰光緒

己卯舉人知縣秦德埏聘室有小螺盦詩詞

平景蓀曰女史生而嫎嫎眉目如畫甫晬喜跣坐見者異之好讀書十二歲師蕭山曹大令壽銘授以唐宋人詩輒仿爲之旁及倚聲繪事涉筆罔勿工願祝女史以弱女子楮顏其間社中譏集徵引故事狎不省所出或以寸楮叩之女史卽爲疏本末取插架書覆之無一字譌其博識如此字秦未行卒年十有九著有小螺盦詩詞二卷其梅花畫人傳續衡蟬錄皆成

詩話越晚幼聰父奇愛之八九歲時避難海濱爲齋有醉芙蓉花時如雲錦父謂舊愁新病惜未能一吟賞卽對口此所謂年年不帶看花眼不是愁中卽病中也其類悟類如此既亡父廣徵哀誄次其病中瑣事爲小螺盦病榻憶語千餘言復寫綠楊鐙景圖李越縵爲之贊越晚生前閨閣中有願結盟者輒婉謝惟與此鄰王仲昭女史綺爲文字交其業師曹文孺有春色兩家分占處綠楊鐙幙雨中鐙之句仲昭哭

越晚詩云學書記得當年事倚硯虛堂坐夜深花月
一庭人靜候隔樓時聽讀書聲曾過妝臺寫恨詩一
編讀罷愈相思綠陰如夢重簾鎖惆悵吟成少故知
掌珠光墜暗書樓贏得臨風感白頭一幅烏絲千點
淚壽星桃
外冷於秋

蓮房

人愛榴房紅儂愛蓮房綠颺風作房老綠珠勝紅玉

曉起

嫩涼如水沁吟牀未擬開匳洗曉妝清露滿階收粉豆玉
簪花畔劑秋香

偶成

春深風絮撲簾衣才熬銀鑪篆影低爲寫金經剛試手綠
陰一院畫眉睨

仲昭家薇花紅出牆外

聽得詩聲隔絳紗一雙燕子巧藏花玲瓏莫搗麝脂雪但倩仙人鳥爪爬

繆寶娟字珊如常熟人吳縣光緒癸未進士改庶吉士
歷官直隸候補道李振鵬室有倦繡吟草

詩話珊如工詩能畫與粵霽幼年皆隨宦入汴結稿後夫婦並擅才名有得珊如畫者必更索持霽題之以爲合璧珊如兼工制藝錢調甫中丞開游梁書院課宦游子弟傳霽與焉有時或合作一藝閱者莫能辨也譚復堂題其橐云中州文獻舊知聞嶽色河聲自不羣名士翩翩爭入洛掃眉人物亦機雲

春柳

楊柳絲絲一望齊和煙和月拂長隄畫樓雨細眉痕淺綺陌風輕舞影低金縷翦成穿紫燕綠陰織就轉黃鸝那堪臨別陽關道攀折年年送馬嘶

懷貞如姊

明倫彙編 家範典 卷一百一十二
五
妝臺眠食近何如走筆殷勤問起居秦嶺雲高孤一雁衛
河水闊滯雙魚憑欄已是花開後捲幔剛逢月上初此際
相思千里共幾番西望倍躊躇

春日

千條楊柳拂簷低十二湘簾捲未齊深院無人春寂寂碧
桃枝上一鶯啼

柳花

淺映眉如斂濃拖眼欲迷人休便折留覆短長隄

送春

園林無力護芳菲紅漸蕭疏綠漸肥蝴蝶不知春已去殷
勤猶傍落花飛

雨後殘香何處來飛花成陣颭蒼苔鶯兒並坐枝頭喚底

事東風竟不同

伊署小園

森森修竹夏生寒
新插花枝界畫欄
行到綠陰最深處
雙鬟閒弄釣魚竿

秋夜偶成

滿天霜氣撲簾旌
秋逼人來夜更清
幾點殘星橫漠漠
數竿疎竹拂窗輕
空庭落葉因風走
老樹棲鴉見月驚
何處砧聲敲轉急
夢闌聽去倍分明

歸甯伊川道中作

向曉入幽谷
千巖秋氣清
斷崖飛瀑布
碎石咽灘聲
地僻人難到
山深鳥自鳴
崎嶇三十里
一角露層城

洛浦春游

東風吹度洛川濱
轆轤香車碾
輭塵樹色含煙
山潑翠波
光如鏡
草鋪茵
漫疑漁父來秦境
擬效陳思賦
洛神指點
扁舟來一葉
三篙喚漲碧粼粼

錦屏晚眺

瞥見城南列畫屏
登臨遙望醉眸醒
四圍遠樹低平野
一角斜陽上小亭
古寺鐘鳴僧罷飯
幽林風定鳥梳翎
歸途回首滄茫裏
十二峯頭不斷青

登龍門游香山寺

攬勝偶登臺
憑高眼界開
山深人不見
松靜鶴初回
水自峽中出
帆從天外來
游觀渾未倦
夕照漫相催

雨後

雨後一憑欄
四顧天清朗
深院寂無人
明月青苔上

荷鐙曲

藐姑仙人關晚妝
戰塵不動羅綺香
金釭照耀爛如畫
三十六宮春正長
兒家生小承恩日
華清浴罷嬌無力
歸來寂寂掩瑤扉
玉階人靜露珠溼
無端急勅召湘妃
小隊銀鐙夜打圍
箔底細簪金錯落
簾邊親啟玉葳蕤
珠圍翠繞紛遲迤
照見鴛鴦春似海
杏子衫輕偎影紅
桃花裙褶拖痕紫
玉腕玲瓏大小垂
酒酣零亂舞腰支
最憐嫋嫋楊枝細
弱不禁風欲墮時
靡曼妙態紛相擾
風鬢霧鬢知多少
唾花餘碧石華輕
化作湘紋籠縹緲
此際銷魂神采飛
此時擢秀幾瓊枝
當筵莫怯娉婷甚
幅幅紗籠好護持
宴罷歸爲綴珠戲
濡毫手作釐山記
明璫火齊爛不收
七尺珊瑚等閒碎
似聞仙樂奏雲璈
如有衣香冉冉飄
羊侃簾前

蘭半燼扶風帳外樺全燒別有愁蛾夜收靚洞房深邃
蛻膏冷遙看紅雲捧玉皇倚欄寂寞羊車幸我亦青蓮夢裏
人苦心蕙蒨不分明樽前欲借神光引一把三生證夙因

田家

數椽茅屋野人家落落疏籬一徑斜山雨欲來林鳥寂
蛻飛上水蓼花

題漢未央瓦硯歌

紫雲一片土花結寒光隱隱凝霜雪流落人間三千年不
隨碑碣同磨滅古來宮闕盛炎劉未央宮與阿房侔阿房
一炬成焦土漢家片瓦猶千秋片瓦功能奪真宰蛟龍泣
罷虬痕在質堅不爲歲月磨色古豈歷風霜改昌溪吳氏
寶用之滄桑變幻不可知洪子嗜古有奇癖得從古市光

陸離盛以寶盒盤蛟螭奇氣掩映珊瑚枝岱翁銘字工刻
鏤鄮侯古篆形模舊精金可鑠石可灰此物永並鼎鐘壽
慕昌淮字壽荃蓬萊人翰林院侍讀榮榦女南皮舉人

張元來聘室有古餘薌閣遺詩

詩話壽荃十餘歲賦航海圖詩蒼古有奇氣喜讀史
事父母以孝聞年十八字元來久未娶元來病歿父
母爲議昏定與鹿氏將受聘前一日爲母誕辰含笑
捧觴夜闌視親寢嚮晨自盡遺書并附別親詩四章
張氏以柩合葬元來之墓壽荃嗜吟詠工繪事所爲
詩凡千餘首書畫百餘紙捐生前盡焚之其外祖母
嘗存詩一卷即古
餘薌閣遺詩也

早秋

風蟬鳴苑柳薜荔繞牆翠天空清如水西風生爽氣池邊
開晚蓮階下發新蕙待到中秋日延月賞秋桂

報國寺看花

逍遙古寺中斜日上林頂禪院靜無聲微風弄花影雨過
野禽寂一樹碧桃冷徘徊幽徑側愛此芳春景碧草滿山
亭鐘歇日正永客去晚風涼松上鶴初醒

春暮

皇州春晚柳依依溼翠侵階苔蘚肥滿地落花新燕乳一
天疏雨曉鶯飛茶煙幾縷閒留樹輕絮無聲暗撲扉歷亂
碧桃開未盡幽庭猶自弄芳菲

雨後則事

雲開猶漠漠雨過一鴈飛落日長天迴開簾雙燕歸嵐光
闌遠岫苔色上柴扉向晚喧漁市風腥銀帶肥

納涼

碧天初過雨露坐納涼時夜靜月光朗風吹花影移蛩聲

鳴暗水螢火落疏籬坐久清宵寂荷香滿曲池

月夜

日落碧天暝深樹棲鴉集開軒納夜涼秋蟲一何急幽庭散花影月色皎如日夜靜竹風清流螢飛復息

雨夜讀書

密雨喧苔砌芸窗夜讀書吟聲深竹裏涼意一鐙餘風起蛩鳴急更深暑氣除流觀千古事此樂有誰如

九日天甯寺登高歌

我來正值西風時千林紅葉舒清姿禪房花木頗不俗況復黃菊開滿籬更登小山騁遠目杈枒老樹皆十圍雲際陰陰日明滅嗷嗷天末鴻雁飛徘徊且倚石上酌清霜已降蟹螯肥茱萸滿杯新釀綠無言獨自延清暉此時微雨

斷復續蒼然淫翠沾人衣落葉滿山萬籟寂惟聞松間時
涓滴微風作冷客欲歸清磬一聲寒煙夕

上元

微風十里颺紅塵寶馬香車過往頻雲歛三霄捧華月
鐙明萬戶闌重闌紛紛絲管良宵永隱隱樓臺淑氣新
游戲長衢冠蓋客不知誰是上書人

擬古詩

雄才柳柳州文名少已擅如何附權貴遂令人所賤幽蘭
竟遭鋤焦桐終入爨行潦本無根雨過即漫漫浮游水上
萍胡爲生其面從橫更不久水涸萍亦爛君子慎厥初當
幾貴立斷秋風思蕣菜偉哉彼張翰

羣雄逐秦鹿楚漢久相持矯矯淮陰侯右漢心不移下趙

威名振定齊先聲馳嗟哉赤帝子推食復解衣固陵期會
戰如饑望黍醢詎意重瞳滅僞游忽相欺野雞任肆毒鐘
室遭誅夷靡靡單葛衣鮮白如凝脂夏著何疏爽秋著何
淒其物性豈異昔著之非其時器敗蟲乃生恩寡纔間疑
密謀鉅鹿守此語復誰知

道上卽事

古道西風急鈴聲自往還孤城殘雨外落日斷霞間秋色
團高樹寒流嚙斷山長安回首處千里白雲閒

浣花草堂

稷契原無愧栖栖終倦游干戈空涕淚詩筆卽春秋茅屋
經今在寒江鎮日流伊周如坎坷著述亦長留

題航海圖

長風莽漾荒煙織萬峰倒插駭浪逼寒星炯炯海天高孤
帆如箭接紅日

夜宴外家浣翠亭

西園成雅集清夜寂無喧冷露團花影寒波歛月痕危樓
倚空翠疏柳挂黃昏好爲留餘興中秋結桂尊

道上

高嶺簇雲起梅花將破顏凍雲寒歛日急雨冷吞山黃葉
猶依樹征鴻已度關人家前去近犬吠暮煙間

蓬萊閣觀海歌

蓬萊傑閣凌長空東海名勝常稱雄俯窺滄溟渺不極蜃
市變化虛無中我本好奇逸興發一尊特向高臺設是時
澹日過朝晡海雲如墨浪翻雪狂飆驟起萬山昏長天吹

破青銅色驚濤澎湃島嶼動喧阗震裂老蛟窟驪龍怒起
戰翔陽水上浮光明復滅大魚鼓鬣似奔雷百川一吸噴
成沫有如錢塘破陣舞百靈恍惚紛出沒馮夷擊鼓天吳
歌耳目恹恹心驚絕雲開風靜波浪恬神山遙望青巉巖
玉妃素女向我笑金枝翠羽藏煙嵐海闊天空萬籟絕無
言獨下潮海庵歸途衣袂風嫋嫋好趁夕陽聽水鳥紅塵
回首望高樓楊花亂舞山城道

和浣雲九姑征夫之作

風高萬木嘯胡笳悲清秋臨河撫長劍慨然中心憂憶昔
虜氛熾殺氣衝斗牛丈夫志四方不顧兒女愁奮志辭鄉
里驅馬長悠悠名王繫頸歸胡騎屢見收清霜已滿鬢隴
水停不流一身經百戰偏裨多封侯人生趨王事豈爲身

命謀苟得展懷抱麟閣非所求

即目

閒看秋色到山家幾曲清溪綠樹遮驚起一雙黃蛺蝶見
人飛入野棉花

憶梅

忽憶羅浮下寒梅花正繁祇應餘翠羽相對語黃昏悵望
霜三徑清寥酒一樽滿天風雪裏獨自向前村

冬夜欲雪柬諸弟妹

寒雲欲釀雪黯澹夜天迴幾度開簾望疏星猶耿耿黃葉
嘯空階霜氣透衣冷朔風號夜柝凍鶴拳松頂缺月露微
光寒梅瘦無影轉瞬玉花飛待子傾新茗

嚴子陵

大度劉文叔重興漢室秋諸公盡麟閣有客老羊裘流水
淘榮辱機心付釣鉤大夫如可屈應久覓封侯

金臺覽古

沙氣蒸雲落日黃西風高嘯萬林霜金臺駿骨歸何處古
木寒鴟鎮夕陽聊共新詩添點綴空餘衰草閱興亡燕昭
身後望諸去勝跡當時久已荒

蘆溝橋

晦夜猶留月半環應憐旅客道途艱人來京國馳如驚月
到蘆溝亦不閒野霧濃蒸千樹合寒流倒影一鉤彎長安
此去無多路縹緲紅雲擁九關

梳妝臺

金國蕭條萬事非妝臺猶說李宸妃芳塵無復淩波步霞

綺還疑舊舞衣細雨禁城花自落疏鐘太液燕空飛雕欄
玉砌春長在應有香魂月下歸

初夏讀書雜詠

溼雲蒸落日雨氣潤流黃好風時入戶颯然生微涼晚花
紅墮砌幽草弄餘芳芸編閒披覽虛室澹生香雖慚管窺
豹得失亦評量聊資耳目異安問興與亡好鳥已復鳴相
對更舉觴

深谷有枯草陽崖茂嘉卉茲豈物性殊植高稟氣異巍巍
衛霍勳赫赫椒房勢襁褓皆列侯枝附盡高位功成正少
年天幸易爲致誰識故將軍吞聲霸陵尉

簡子歎雀雉其意殊堪嘲初質猶不保化生亦徒勞如何
秦漢世妄意希松喬蒼生力已盡方士氣正驕秦女去不

返三山終迢遙廢書仰天歎浮雲開碧霄

納涼

避暑池塘雨乍收
芰荷香暗綠陰稠
松間老鶴眠初覺
水底疏星影亂流
夜月虛明輝萬戶
銀河清淺入新秋
好逢八月浮槎至
乞向天邊訪女牛

崑崙奴歌

飛宇連雲列阿閣
相公臥病垂珠箔
中有佳人顰翠蛾
春愁暗逐鑪煙結
干牛省疾乍登堂
楊柳風姿何濯濯
酪醢雖甘桃液酸
幽懷脈脈言不得
臨別殷勤覆玉纖
含情空指胸前月
不教磨勒解疑團
月滿良宵應獨看
力士金椎搗猛犬
雕欄已失護花旛
逐得漁船辭洞口
一肩香雪度重垣
嗟嗟人奴技至此
惜哉未遇漢天子
戈盾林中如鳥

飛汾陽失策復何悔安史雖滅外夷強胡不使之執鞭弭
他年翠輦再蒙塵空令賣藥洛陽市

山行遇雨

驚風挾急雨颯沓千山昏黑雲塞天地陵谷茫不分客子
迷故路四顧驚心魂奇峰阻我前何以回車轅行行且復
上瘦馬淩巘屹砢訇走澗石凍瀑如雷奔輕冰結衣襟山
氣厲嚴寒遠游意良苦悲彼行路難日暮念故鄉東望空
長歎

度韓侯嶺

徑仄勞車馬崎嶇鳥道蟠高皇無寸土孤嶺尙名韓風勁
汾流急峰尖石劍攢何須凌絕頂轉恐下山難

中條山弔司空表聖

落日寒無影層雲萬里陰詩人不可見霜葉一山深墮笏
非嘉遯成仁悲陸沈清風誰許並遙對首陽岑

潼關行

東走黃河西華山屹然當險開潼關雉堞高插青雲端一
夫堅守稱萬全桃林戰士二十萬誰致死之哥舒翰三秦
流血膏胡鋒長蛇封豕蟠關中鑾輿播蕩身降虜勲名百
戰皆成空哥舒失機誠自辱悲哉勝朝孫白谷慷慨臨關
血戰頻孤忠卒難撐全局朝廷政事傷陵夷乾坤坐令煙
塵飛譬如全體皆已失咽喉雖存將安爲是知在德不在
險吁嗟關兮空崔巍

太華山聞鐘

太華新晴宿雨收清鐘遙度夜天幽一聲初動三峰迴萬

籟都泐孤月秋天外微傳元鶴唳樹間時見碧雲流松風
颯起餘音杳霜氣橫空失斗牛

望終南

終南晴後勢崔嵬積雪皚皚萬壑堆天外奇峰連日白山
頭老樹盡花開驚風摧木號陰嶺凍瀑挾冰走澗雷曉起
長安排闥望嵐光如水入城來

雨中游曲江

一天疏雨且銜杯寒食尋芳曲水隈江燕低隨飛絮下春
帆閒逐落花來沙蟠細草縈青帶風捲輕波瀉綠醅回首
當年修禊事蘭亭誦罷更徘徊

霸橋

幾株新綠雨冥冥玉笛吹來隔岸聽柳色不知前代改春

來還向霸橋青初添弱綫繁煙水送盡行人過短亭最是
夜深離別處一林殘月酒初醒

送春

春光此去欲何之好向東風問後期市地綠陰鶯換滿
庭風絮捲簾時遙看別路雲千疊且盡臨歧酒一卮祇有
落花不辭遠多情直送到天涯

讀神仙傳有感

封禪祈靈海上游幾人曾得到瀛洲紫芝東採三山遶青
鳥西飛五利愁終古玉關秦月在祇今汾水漢雲秋劇憐
仙李蟠根大聖祖儼然御冕旒

倚樓

遠岫明樓角扶疏草木幽坐來微雨歇山氣澹如秋

夜聞西風大起有懷文波四妹

西風颯然至萬樹動秋聲懷汝不成寐長歌空復情願言
生兩翼乘此便東征細語別來事宵深酒共傾

左太冲詠史

赫赫金張勢朱紫榮祿峨峨許史廬高臺連曲沼揚雄
獨不達著書攄懷抱偉哉身後名文章傳八表椅桐始生
時見困於蒿草及其凌雲霓傾枝巢鳳鳥奇材有連遭天
命苦不早鯢鵬異鸞鳩知年有大小

謝靈運游山

弱冠懷微尚復與世相逐違志茲二紀謝病返初服尋異
淹晨昏賞心窮水陸層巖備登頓平林恣遠矚陽葩相映
蔚幽草亦芬馥微雨過春江蒲稗生新綠水流慮自澹山

深入絕俗行從太公任竭伐謝林木

杜子美出塞

含悽別親故驅馬度塞垣驚風撼陰海大雪壓龍山胡天
雲氣惡我行何時還朝廷方勤遠壯士敢顧身所憐多死
亡何以答吾君男兒則戎事報國當及辰榮名患不立成
敗何足論

韋應物訪友

言訪攝生客持榼披雲樹采藥猶未歸一鳥煙中度悵望
碧雲深幽人杪何處日暮雨蕭蕭獨下寒山去

別親

祈招興詠幸三思叔世陵夷亦可悲門戶已開闔蜀洛坡
公端不合時宜

伯道無兒真恨事中郎有女劇堪憐淮陰易轍原良策急
爲相攸慰九泉

謝卻塵緣俗累紛獨傷白首負辛勤此心難使幽明間泉
下還將望白雲

幻影浮漚廿八年庭闈別處轉淒然聰明根蒂如留得不
向他生再種緣

絕筆

雨中杜宇嘯濺盡一腔血莫化斷腸花肝腸已斷絕

謝佩珊宜黃人同縣許汝機室有吟香閣詩文初草

單受茲曰佩珊事嚴姑五
十年無失歡鄉里稱盛德

憶母

釵裙猶未改作婦豈忘箴勉遂阿姑意恐勞慈母心晨昏

知禮拙教養念恩深誰謂歸甯好翻教淚滿襟

謝漱馨宜黃人同縣吳恩晟室有晚香堂詩橐晚香堂

詩社橐

單受茲曰佩珊與漱馨爲姊妹予隨外子旅俄時卽知謝太夫人工詩蓋外子適與太夫人次子劍秋同戚族賡倡之作想見家庭樂事一門

望外信久不至

人去天涯遠魚緘竟渺茫春閨添悵望旅舍諒安康豈是音書少知因道路長遙思游子意魂夢早還鄉

蕭道管字君珮一字道安侯官人同縣光緒壬午舉人學部主事陳衍室有蕭閒堂遺詩

詩話君珮好讀古書湛思有得其學力見於列女傳集解自敘文與詩詞蓋其餘事光緒丁未秋病歿京寓石遺爲作蕭閒堂詩三百韻有忌日湖州守生年璣下移之句自注趙德甫以八月十八日卒李易安

自稱爲後年五十三君生年卒日適相同爲刻道
安室雜文蕭間堂遺詩載花平安室詞各一卷

春暮

春暮花飛盡無人寂閉門滿庭苔草色詩思在黃昏

窗前樹金銀花一架

醺醺香夢何思思花散天女褪紫紅天然金玉抱奇錦
繡照耀謝化工美人薄采不盈掬宜男待女怨東風煙攜
雪挺舉素袂淡黃深白搖綺櫳低垂蕙帳悄然覺蘅蕪恍
惚把芳叢殘蜂倦蝶不到處無衣妝額尤玲瓏美人何日
不成虹白雲黃竹逢西東

春陰

薄帷淡如煙春陰濃於墨窗前倚復倚稍覺寒惻惻顧茲
瓶中花倍有銷魂色因思成小築萬本會香國南軒坐管

領紅紫面皆北太陰有鍊形暄妍未爲得

七夕雜詩仿曝書亭體

定有瓊樓特地涼銀河爛漫起紅牆黃姑曝慣黃綿襖不
領天孫雲錦裳

西風不算清涼繳南阮無多黃竹箱擁得桃笙背鐙坐月
痕如水過東牆

碧海青天幾度來壻鄉縹緲指蓬萊嫦娥嬾見雙星會慚
慚靈妃喚不同

依舊東西溝水流有人爲古起擔憂玉皇不付馮煖券何
處婚錢醵阮修

秋聲不起青楊巷夜色平分黃篴樓曬罷殘書無箇事詩
情佇到箇螢流

西郊上冢即目

薺麥東風綠菜花斜日黃郊原好顏色生色上衣裳
梨花零落盡獨有豆花肥多謝東風意微香吹撲衣
水田眞漠漠雨後少人耕白鷺不飛去相隨立復行

夜坐

下簾剗機移蕭寥夜又冷窗紗厭白地位以瓶花影微風
爾何來欺我鑪煙挺昔年兩無寐索句銀燭秉畫屏看雙
星嬌寵形影並無眠更延佇釵劃月痕等良夜去迢迢有
如蘭缸耿與君復此夕靜味當細領宿雨響不停譙樓靜
而迴獨憐棲鳥驚踏踏怯寒梗

有所思

桔槔聲裏月如煙危欄虛倚愁不眠夢魂飛越路三千碧

雲樓閣何處邊下有清影照嬾娟亭亭隱約畫廊前此時
幽怨鬢斜偏紫霄鸞鳳乘何緣西風寫韻傳一篇不然湖
色西子妍波紋滑笏如春箋飄零風露共叩舷雲鬢香霧
溼可憐棄擲寶枕夢游仙銷歇錦瑟張鷟絃胡爲落葉聽
哀蟬蘧蘧蝴蝶去不還秋更一一年復年

龍華鎮看桃花

龍華桃花十五里桃花紅白玫瑰紫游人看花兼看人馬
如游龍車如水冑枝裙衩香春風映肉花光一何綺游人
只恐斜陽暮照影爭憐綠波美長安水邊不可見湖西花
鈿只如此明朝處處賣花聲苦報春光疾如駛

暑晚得雨

疏雨灑池竹雨斜竹已垂繼以微風度門館生涼時細點

溼窗紙餘颺颺書帷瓶花如新潤鑪煙惟清絲於焉遂延
佇數語不成詩

秋晚

蟬聲搖曳歇庭院晚涼留衫袖風添裊簾櫳月當鉤竹香
秋夢碎樹影夕陽收亦是詩家語誰能刻意求

微月澹空庭薄雲天際青鳴蛩猶閣閣瘦蝶已星星曲院
蕉疑雨疎窗鐙似螢江湖少焉至荻葉最堪聽

姚倚雲桐城人通州范當世室有蘊素軒詩彙

偕大姊晚眺

何處鐘聲逐晚風碧天雲淨夕陽紅漁人隔岸弄明月白
鷺銜魚出柳叢

除夕和三弟

骨肉得爲樂聚散良有已除夕薦芳尊相對如夢裏承懽
白髮前繞膝孫曾喜側聽爆竹喧坐待晨光紫但恐開歲
來復作遠游子

安福問子規寄懷大姊

高柳依廊疏影低碧天清夜子規啼無端惆悵思千里雙
桂樓前月向西

和夫子

文章浩浩古人長快意雄風憶大王黃鵠不知天地遠黑
貂應覺雪霜涼樽前卽壑資談笑眼底江山起病疴隔歲
離愁定無限只今且復爲君強

用歐公韻寄夫子

憶昨送君時風光正春日別離那可論此心良忽忽雖有

千萬言心悲不能出深恐擾君思迴腸忍淚沒自君遠行
役承歡雙親膝黽勉敢憚勞夙夜懷懔懔初來未盡諳兒
女相輔弼慙惶提斯心安得往時逸風月非無趣每每看
令失時或有佳致十不能得一感念高堂慈遇事必寬恤
有時憐其長命之和新律亦欲博親歡苦思真咄咄流光
何迅速夏去秋風疾相思惟自知烏能向人述忽得桐城
書青山已卜吉覽之涕交流豈敢望歸必老人竟領首許
其返蓬華又得津門書周旋語意密極論劬勞恩去日若
鞭挐汝心苟不從遺恨當斧鑕故爾辭兩親脫身不用乞
在道感君懷反復視君筆憂思安能已徒有淚橫溢君誠
不自聊尙恐吾心鬱何以報深情珍重爲君匹倦極入幽
夢相見在髣髴忽爲晨鐘醒勞生待誰嫉茫茫大塊中爾

我定何物好留泡影嬉祇待白頭畢從兄復登舟亦任風
濤颶萬里若乘槎蒼茫近太乙雲際山迢迢楓林秋瑟瑟
寒沙羣雁噉荒渚幽蟲唧皓月一周天片帆抵官室悲喜
涕重闌親情繞諸姪舊日閨閣中妝臺盡散佚芙蓉尙含
苞丹橘猶結實依依我親傍留連復惕恍聊慰罔極恩寸
心中自効且復愛年華新妝待君擲翱翔好致身憔悴嗟
吾質不然陶翟耳吾豈慕高秩堂上七十年人情三百紱
聶炳相字雉梅宜賓人江安光緒戊戌進士編修直隸

提學使傅增湘聘室

詩話雉梅爲趙給諫樹吉外孫幼嗜吟詠得其指授
與傅氏締姻涓吉有期而殞瀕危時口吟黃蝴蝶句
沉叔悼之成懷仙詩入章有乞得彩鸞書一紙此生
無福學文簫南山舊有懷仙賦我亦銜哀孽蜀牋之
句自注余歸蜀從其家檢得手書一
楚張南山有懷仙詠爲聘室某氏作

送豫生七姑北上

重碧輕斟盡一觴柳絲無力綰離腸
長安西笑誰言樂江水深愁未可量
眉嫵待傳京兆筆詩懷應滿野雲囊
懸知燕草明年綠定憶家山苦筍香

重碧酒樊道苦筍皆吾州名產也

吳怡字歡佩一字紉萱武進人舉人廣東同知翊寅女

同縣廣西蒼梧知縣莊炎繼室有玉清館詩草

詩話初萱孩提時偶曉聞吟詠聲即輟涕而笑及長勤讀能詩好論語莊子作書初習北魏碑後改習孫過庭書譜恆言唐以後女子無工草者吾欲竭二十年之力以北碑筆法作草體當能獨樹一幟

游山同翰君作

落日陀臺畔晴空一雁飛平蕪迷望遠野鳥向人低
金井淒寒縷秋砧擣客衣故園松菊好三徑願同歸

七夕示翰君

畫屏無睡怯新涼
秋點聽殘夜未央
耿耿銀河望靈匹
娟娟素月照流黃
星盟鈿盒應珍重
石贈支機事渺茫
爲恐良時容易盡
綠章願乞此宵長

答姊病中秋感示扁善

小山叢桂暗香浮
極目平蕪起暮愁
示疾維摩時戀榻
倦游王粲怯登樓
身如客燕仍爲客
心似秋桐易感秋
何日萼蘂遂歸思
五湖偕隱狎閒鷗

七夕前一日獨坐簡扁善

月影移花度綺寮
簾垂銀蒜夜迢迢
秋螢吸霧棲煙葉
涼露侵人溼翠翹
小別慢栽紅豆子
閒情且倚紫瓊簫
雙星漠漠秋河澹
睡鴨餘薰已半消

和家大人上巳日作

微雨簾籠燕影斜。博山香細透輕紗。春陰十日朱成碧。幽恨頻年鬢欲華。漫學參軍作蠻語。且持樽酒餞飛花。比來客思頽唐甚。懶逐游人鬪鈿車。

九日登越秀山和家大人步東坡惠州韻

海門日落角聲涼。庾嶺霜清橘柚香。幾處寒砧催木葉。頻年倦旅怯秋光。登臨朝漢荒臺畔。憑弔降王廢苑傍。莫問當時歌舞地。暮雲愁鎖綠蕪長。

秋日越秀山懷古

蒼茫弔古獨登臺。極目天南瘴霧開。一代興亡悲黍麥。千秋霸業臘蒿萊。陸荒禁苑耕殘瓦。潮落珠江冷劫灰。回首玉鉤斜畔路。素馨寂寞鎖寒暉。

落日秋原草木彫。斷垣殘礎認前朝。呼鸞道廢佳游歇。戲

馬臺荒霸氣銷嶺海蠻煙愁陸賈陀城瘴雨弔任鷲登臨
不盡滄桑感怕聽西風咽暮濤

和沈季文王子除夕感懷詩元韻同翰君作

歲去無踪杳莫尋百壺春酒且重斟丹顏綠鬢隨年改密
詠恬吟坐夜深六合之中皆寄旅一杯以外聽浮沈紛紛
時局方爭鹿漫詡河山似帶襟

王嗣暉悔甯人有滋蘭室遺藁

詩話嗣暉聞雁詩吳摯甫評爲何異太白王夢湘題
其藁云空山秋盡白雲寒日出疏林下急湍一曲冰
絃沙雁落無人知是楚妃彈

秋感

瑟瑟江頭楓樹丹蘆花吹盡笛聲殘愁經病後心逾淡詩
入秋天意更寒斷續繁碁催野渡蕭疎木葉響雕欄亂山

疊疊斜陽裏剩有歸鴻天際看

明妃

雁聲催向玉門關一曲琵琶馬上閒回首漢宮三十六獨
留明月照朱顏

寄紹芬姊

靜坐何寥寥靜夜何迢迢迢迢有所思別意豈能拋念子
不成寐燭淚搖綺寮從來離別心有筆難盡描子之趨庭
日我昔正垂髫攜書析疑義鐙下爭拈毫春來桃李發酌
酒興自高秋深夜雨寒詩就共推敲埋首閨閣裏有懷徒
爾豪今子他人婦兒女共嘈嘈調羹奉阿姑婦道應自操
不復侍椿萱惆悵關山遙得會亦不久得共無幾朝雁羽
況沈浮兩地愁相交春寒日益嚴春雨何勞勞夜來不可

聽隔幕風如刀念子益愁思愁思不可銷一夜夢飛渡月落胥江潮

歸鹽官留別諸姊

如何離別意相對轉無言回首滄江上煙波易斷魂

離家

離家已五日不盡故鄉愁驛樹一行直空山兩岸秋暮雲依鳥沒寒角咽江流獨立一相望蒼茫何所求

暮眺

人生有會必有別離別何須心懨懨秋風一夕送行舟江水茫茫浸落日浩然曠望天地間去水浮雲兩不絕吁嗟乎山高高兮水深深我道困兮不可行誰是人間豪俠子磨刀海上掣長鯨

渡江遇雨

大風起兮浪頭急天地合兮渺一色
雨絲絲兮煙紛紛霹靂一聲千嶂黑
行路難兮行路難江上長鯨勢何仞

舟中

一年三渡此江濱歌哭文章我更真
回首蒼茫一灑淚人間深恨著何人

聞雁

一雁哀鳴深夜過寒鐙無奈客心何
孤飛憐爾荒江道荆棘嚴霜處處多

舟中夜坐

荒岸殘宵角孤舟不寐人搖搖紅燭盡
磊磊白波新莫爲悲身世憐余有老親
酒痕和淚跡多半洗風塵

登浮翠閣

心事蕭條未可論
愁來風雨度晨昏
天涯尙有思親淚
日暮登樓恐斷魂

仲春初十日大雪

東風未若北風冷
春日風聲勢何猛
大雪紛紛天外來
乾坤散作冰壺影
天公玉戲真輕勻
人間哀樂何不均
貂裘獸炭尙呼酒
豈問街頭寒餓人
東家寒氈夜苦讀
西家紡織一何促
公等圍鑪更不聞
沈沈清夜度歌曲
曲中亦有哀樂聲
昨日沈醉今日醒
項王氣盡烏江上
赤帝江山今亦更
可憐世上兒復此
紛相爭吾持長劍
發悲嘯斗酒十千
還獨傾不唱行路
難不求青史留姓
名但願世間冷熱
不到我長歌來去
一身輕

季秋初七夜登舟留別重闌

登程更已殘夜寒生淒惻微風淡雲月清露孤舟夕回看
水茫茫江影千重白俯首一沈思轉側愁更憶阿爺白髮
多阿母衰顏色臨別語殷殷一步屢休歇囑兒勿思親親
側人如積阿姊隔無多阿妹同衾席阿兄將至京有嫂能
侍食出房語復語大母重呼入秋盡早製衣寒近催刀尺
今夕兒自去兒像留吾側未能同色笑聊可慰岑寂莫爲
兒女態早定歸甯日當此愁思中轉覺歡無極人生樂莫
樂何用長歎息

秋暮

秋暮蕭蕭雨蘆花兩岸聲愴然一回首殘月下江城

雨晴

陰雨連宵晨蕭蕭灑庭屋當軒坐晦暝穿戶多蒼竹幽居
本絕塵洗濯益無俗閉門不見人橫琴只我獨臨風發遐
想清絕愁中山吳歌日怕聞越夢斷難續晚來雨忽霽晴
靄橫崖谷落霞暮欲銷微陽暗牆角鳴鳥歸亦盡庭戶猶
無燭蒼茫一望中萬緒千愁觸天地本無窮人願如鴻鵠

芳草

空谷多芳草靈根得天早幽幽深山中風露自昏曉待之
美人採以供騷人藻誰知時俗人攜向羣花道馨香不足
貴桃李春情好豔色媚繁華曉聲多時鳥東風送晴暝閒
關音逾巧可憫蘭蕙花掩泣以終老

望月思家

秋盡江南寒氣深城高野曠急荒確蕭然一片吳門月盡

是殘宵越國心

枕上偶成

倦思如塵撥不開一天風雨鎖樓臺無人院落清明後半
徑殘花燕子來

史濟莊字敬之一字九畹江都人鹽城金倬雲室有九
畹齋詩藁

詩話敬之性純孝聰強善記憶能詩詞工楷法端忠
敏督鄂時延致署中課女任京津女學校教習才名
著

京江晚泊

舟繫垂楊岸金焦正夕陽客心秋水遠村樹暮煙蒼山帶
魚龍氣江涵日月光吳歛猶在耳明日更殊方

有感

故園重返慨滄桑屈指虛拋駒隙光多病常教翻藥譜壯
心降盡棄文章夢魂縈繞韋南國時四妹隨宦滇南身世提撕累
北堂翹首雲天秋色裏飛鴻萬里意蒼茫

久不作詩偶見舊稟戲成短章

曾學坡老戒詩篇忽見舊稟心茫然拋殘棄置業已久阿
誰阿護疑神仙平生鈍摯無所好差喜結得翰墨緣淺陋
粗疏何足道不爲物害爲物嫌山頭謳歌惟恐罔兩怒江
上行吟又恐驚龍眠歲月虛拋佳景負緘口更比金人堅
誰知造化笑我才短不足忌許我拙句人間小住三千年
書介眉大兄紈扇

江山覽勝近神都游興休將詩興除七十二沽煙景好如
何不寄大雷書

楊延年字玉暉湘鄉人湘陰左念康室有椿蔭廬詩詞

存

單受茲曰玉暉爲楊石泉督部孫女左懷藪爲文襄公孫均中興世族懷藪於辛亥後侍其父子異方伯歸長沙而歿

甲午感事

羣流無策可安邊促漏遙鐘罷講筵聖孝未忘天下養瑤池猶自進歌絃

漢口

江城風景好覽勝一登樓渺渺楚天闊滔滔漢水流鐘聲度煙樹檣影集沙洲亦有思鄉意浮雲黑上頭

千里

千里家山縈蝶夢九州烽火警歸心桃花流水應如舊縹

緲仙源何處尋

蓬萊

蓬萊自古道仙鄉焉得浮槎一葦杭羨煞島中千歲鶴白雲天際任翱翔

玉階

玉階一葉梧桐下落盡紅蓮冷香榭銀河皎潔無纖雲轆轤金井寒泉瀉驚秋鸚鵡倦無言微霜昨夜凝鴛瓦繡幃風靜鑪煙裊瑤瑟湘靈韻斯杳洞庭水滿衡岳高歸夢池塘有青草大椿輪囷竦卷阿棣萼花開月圓好安得神仙駐景方世免別離人不老

舟行

歲暮風雪寒江湖尚行役勞人豈得已鬱鬱榮心曲凍雲

出岫忙倦鳥依林宿晴川煙水清鬧市飛塵獨回首望京華遠山鎖蒼綠

姚素榆字蕙農常熟人道光壬辰進士御史福增女孫

同縣光緒拔貢宗威繼室有聯珠集

詩話素榆與妹倩及苴皆有詩名于歸後隨宦大梁質庶京師聞房唱和人豐稱之其聯珠集則與倩苴酬唱之作樊樊山題云姚女兒家三朵花肉身同苗水仙芽紅闌手寫聯珠集不獨詩佳壻更佳

丹徒張孝女割臂療親

人間無盧扁海上無仙方溫溫藥鑪火慘慘宵銚光斯時弱女淚凝潰病母牀母呻何宛轉母體何羸尪兒身卽母身中夜摧肝腸醫言不可藥呼籲天蒼蒼并刀薄於紙皓腕凝雪霜至誠格金石血湧如無瘡漉漉一片肉勉進阿母嘗母女本一氣無形補膏肓能令死者起能令弱者強

孝哉張氏女北固清風長

花影

寂寞庭堦滿碧苔等閒著地萬花開霎時捧出玲瓏月天
嬌繁枝入坐來

中秋

露溼空階翠袖寒醉餘慵倚玉闌干遲眠爲惜清光好此
景人生幾度看

落葉

秋風料峭掩柴關小院塵氛刪未刪一縷茶煙生竹外幾
番霜信到林間詩成渭北雲擲樹夢繞江南雨滿山愛煞
停車相賞處等閒著地錦爛斑

倚闌小立怕輕寒極目長天雁路漫古木因風秋籟急空

庭咽月笛聲酸情移故國飄零久葉寫新詩仔細看漢苑
哀蟬初罷曲也隨流水到江干

綠減黃稀造化工終年身世等飄蓬霜凝衰草連天白風
撼寒林匝地紅四野秋砧紫別思幾行塞雁過長空征人
冀北音書斷日暮關山夢未通

轉瞬黃花晚節天吳江秋老劇堪憐乾聲帶雨戰林表瘦
影和煙亂砌前霜冷風高無限思雁聲蛩語未成眠小窗
鐙影紅搖落月照東牆正上弦

隨外之汴梁

秋風落日古夷門歷碌舟車紀夢痕此是鄒枚舊游地可
容著一女文園

梁孟當年共賃居謁來宦海又何如筆牀硯匣無多物位

置詩人小小廬

家居

多事蕭郎愛遠游
半村半郭足清幽
日斜低沒橋心影
風緊難維渡口舟
客路漸迷新綠草
農家舊住小紅樓
等閒忽動天涯思
極目江關渺渺愁

小立

清香故故上衣襦
儂向瑤臺住得無
涼露三更人獨立
滿身月影倩花扶

寫懷

帝京旅食自年年
小隱城西卜宅偏
七事安排中饋職
一囊辛苦賣文錢
能修甘旨知見大
善解心情識壻賢
爲索新詩支枕待
一鐙形影夜遲眠

姚倩字倩君素榆妹同縣言微繼室有南湘室詩草

詩話倩君隨壻游吉林及日本萬里舟車不廢吟詠其南湘室詩草與妹蒞所作合刊亦閨中之花萼集也

春暮遣懷

世事浮沈漫共論蕭蕭梅雨掩重門
畫屏病起寒猶怯繡被香殘夢不溫
飛絮簾櫳春寂寞落花庭院月黃昏
比來贏得消愁法一卷離騷酒一樽

子夜歌

添罷博山香笑對銀釭立珍重並頭花
勸郎莫輕別冷月出疏林窺窗皎如雪
試取瑤琴彈泠泠不成曲冬夜抑何長
怕展衾如鐵獨自倚薰籠心碎銅壺滴

歲暮感懷

辜負光陰感百端多愁贏得帶圍寬
沈沈簾幕鑪煙裊寂寂房櫳蠟炬殘
爲理舊詞人轉嬾怕翻冷被夢難安
西風和淚看鴉陣倚徧闌干翠袖寒

畫梅

素縑香染墨痕新倩影疏枝倍有神
嬾向東皇問消息毫端繪出隴頭春

秋夜寄芭妹

無眠偏覺夜漫漫紙樣羅衾不耐寒
從古多情添恨事本來識字肇愁端
綺窗雨過蟲聲切繡帳燈昏月影殘
一語贈卿須記取秋風珍重莫憑欄

春日卽景

輕舟搖過板橋西花壓茅檐柳拂隄
無數落英浮水面隨

波流傍釣魚磯

鬢簪楊柳綠堆鴉薄薄羅衣短短釵最愛平原新雨過落花香染踏青鞋

雨窗感賦

繡幃寂寂掩重門倚枕閒吟被未溫半壁殘燈一簾雨縱無離緒也消魂

東瀛寓園有松柏數十株傍餘隙地一弓以梅花補之

茅檐竹牖傍山涯小住何妨便當家儂自攜鋤君抱甕一庭明月種梅花

曉起

無語坐鉤簾清氣軒眉宇花霧綠濛濛宵來有微雨

新晴

玉階雨過淨無泥
牆角依稀夕照微
卻喜門前春水漲
苔痕綠上釣魚磯

陳麗芳武進人
蕭山鄭孝庭室有壽筠移詩藁

秋夜感懷時羈旅桂林

月涼如水浸窗紗
何處悲聲起暮笳
欲覓迢迢千里夢
可憐消瘦半庭花
露零荒沼蓮房冷
風緊遙空雁字斜
慢道尊鱸滋味好
三吳歸去已無家

張元默字蕙芳常熟人
昭文光緒甲午進士改庶吉士

吏部主事孫雄側室有雙修閣詩存

詩話吳松鄰序雙修閣詩存謂師鄭吏部教姬人蕙芳習爲韻語不數年哀然成帙多表章雅故撫時感事之作與師鄭偶于互應不徒以聲律擅長三百年來閨閣正始之編堪與頡頏者殆不恆見推許甚至

樊樊山題其詩云生日荷花對舉尊今年何以報君
恩書燈並照雲鬢影詩本多留粉指痕老尙畫藤京
兆室醉曾墮馬侍中門天真稟
與長真稟嘉道風流今尙存

己未六月二十一日歐公生日從鄭齋夫子往游北
海又至高廟訪西涯故址歸已薄暮夫子成五古
三章命元默同作

六一先生人中龍四十作記稱醉翁生日喜與荷花近曲
翻金縷杯碧筒荷風送香氣疏放離宮小憩幽襟曠銅駝
卧棘漫生悲玉鷺眠花不驚浪巾車早出侍清游瓊島春
陰十二樓金風蕭颯釀秋意一雨破盡羈人愁迴車更訪
西涯迹左徒故宅憑傳述廬陵接武有長沙天愛名賢付
仙筆季夏生日多詩人歐李相差僅一旬
李西涯生於前
六月九日
有山谷後賓谷西江詩派滌瀾淪笥河吟舫傳詩帙
朱竹君生

於六月六日所居楊花吟筋聚書至數萬卷

貞愍忠魂寄綃匹

湯雨生生於六月九日更

有閨媛方白蓮

羅兩峯之夫人方婉儀字白蓮生於六月二十四日

巧與荷花共生

日我慙鄭婢略知詩仰止前賢類管窺嘉祐文章推雅正

貞元朝士少留遺夫子能文射雕手藏精養晦耽詩酒

歐公集中試筆云藏精於晦則明養神以靜則安晦所以畜用靜所以益動

儻教生在慶厯年及

門定附蘇曾後憂患餘生閱海桑

居士集讀

徂徠集詩云予生誠多難憂患靡不罹宦學三十年六經老研摩

詩箋禮注時稽古酒冽

魚肥自引觴前賢相業都如夢謫宦夷陵任嘲諷篇章元

氣幸長留夜賦秋聲同惜誦西涯積水映樓臺樂府流傳

笛韻哀祭酒詩龕勤嘯詠相公墓草雜莓苔暝色催人越

吟苦歸途帶笠隨臣甫吾儕人海一鷗浮惟有斯文壽千

古

夫子以事赴金陵旬月未歸寄詩代柬

竟夕秋風怯曉寒客中珍重卜加餐
愁心江上思何極詩句眉邊字未安
擾攘蟲沙悲夢幻縱橫蠹簡理叢殘
秦淮風月今何似莫向眉樓乞畫蘭

題瓶社詩錄後

鵲鵲峯高接翠微樓臺無地逐臣歸
騎箕幸在昇平世柏社遷移事更非

官拜司農姬昔賢龍蛇起起厄辰年
文章忠孝傳千古射羿逢蒙愧九泉

襟袖西山爽氣佳江亭薦芷絕塵埃
瓶廬衣鉢傳無限幾輩傷心似鄭齋

辛酉六月十八日爲完顏憚太君星聯生日元默來

歸之年師鄭夫子卽以國朝闡秀正始集授之爰
於中庭設瓜果陳詩以祭謹賦五古四十韻

乾隆卅八年六月十八日太君寶誕生婉婉秉貞質逮歸
泰安君黽勉心如一王姑與尊嫜盟饋禮祇率視聽無形
聲翺翔愆愆失教子爲國楨提撕警織密聰明忌露盡夏
峰語重述名言書諸紳三命戒驕溢賢嗣出臨民夢帝賚
良弼黔荆與皖豫板輿歡繞膝治河復明刑慈訓周且悉
才足濟民物鬚眉詎能匹餘事爲詩歌錦雞傳典帙鉅集
蒐正始表章及遺軼周雅詠思齋鄭風薙淫泆山河賦并
珈葑菲採圭華鳳鸞萃雖啗牛毛細梳櫛有才不自矜謙
抑溫而栗懿範樹璇闥娥眉謝眾嫉二曲有遺書校刊正
屈詰寶錄紹中壘青藜光照室著作炳千秋英聲由茂實

悲余少也賤流離攪疾疴櫛事夫子夙夜劬佔畢未諳
九嬪學粗解五字律瓣香奉陽湖冀免張目叱溫風以時
至瓜果薦芬苾亭亭擢芙蓉唧唧鳴蟋蟀風琴雜象韉聊
當舞庭佾更憶清於君冰獨擅寫生筆粉墨映日光傳神
呼欲出南田有嗣音行輩姑與姪惲氏洵多才詩畫精藝
術藝術詎足誇坤道協貞吉吁嗟世泯芬巾幗流蕩佚往
哲有典型廉隅守秩秩余生雖恨晚雅慕清廟瑟敢效柳
是狂幸事梁鴻逸遺集夙厖沫隨行執丹漆淑靈儻佑我
詩思蘭芽茁

書張樵野侍郎鐵畫樓詩續鈔後

萬里投荒去不還竟難生入玉門關荷戈一集聲哀怨魂
魄猶應戀故山

身經九死輕戈壁地遠重邊到玉河

集中答黃蓮生大令詩句

空向歲

朝占吉語文禽終觸北山羅

樊樊山先生賜題雙修閣近作詩片七律一首謹次

元韻賦謝

吐握常開北海尊三吳士女昔霑恩探驪藝苑傳仙筆化
鶴桑田憶夢痕汲古曾稽中壘傳學詩欲叩魯班門前人
牙慧休重拾手澤長真十卷存

袁隨園先生評先太宜人長真閣詩藁云字字出於

性靈不拾古人牙慧

稽首慈雲禮世尊我聞如是莫酬恩金鯢胡耆春難老玉
螭清游月有痕謝韞因風慙詠絮袁安卧雪不開門舞雩
沂水饒真契溫伯無言道已存

酌兕思稱竹葉尊司書辟蠹學長恩相思南國拈紅豆

先吉

士公有把酒祝東風種出雙紅豆入望西山掃黛痕舊橐
圖十二年前先生曾題七律六首
手鈔居士集新廬指點大乘門先生新卜居西城間游古
寺溫詩夢留得枯荷葉半存昨侍鄭齋夫子爲十刹海之游

秋日清晨從游法源寺歸而賦此

鈍根不解禪愛游禪悅地凌晨叩關入松篁發幽翠謾謾
清風生冷然有秋意無量三昧力功德絕思議龍象眩耳
目蟲鼠哂肝臂略參微妙機同證澹泊志佛堂長明鑑白
晝猶生穗塵寰方擾擾貪癡兼媚忌虎豹競噬人九閭天
亦醉願仗佛力宏三靈宅澄粹花雨散繽紛息此曼衍戲
循廊屢徘徊聯吟觸詩思因風慙道韞雅人發深致丁香
媚三春花時縱游騎隘巷苦喧闐如琴騁六轡今日何寂
寞啟扇薜陰膩深林靜無人隔沼餘殘芰珍禽時一鳴竹

徑憩森邃撲盡東華塵雅宜北窗睡靜中有至樂不須著
一字興盡返寓廬牢愁散羈寄相對欲忘言沉澗有真契
同悟木樨香猶聞松子墜

辛酉九月十九展重陽日從鄭齋夫子登陶然亭感
賦二律卽次夫子重九登遙集樓韻

一角西山送晚涼霜風颯颯倚斜陽時逢陽九秋筇怨節
近冬初夜漏長子美放歌非縱酒義山惆悵是清狂華雲
緜鶴論詩品意緒蕭閒接混茫

鵝鵲縱橫角與張中原龍戰筵元黃西京文物思豐鎬東
海輿圖失樂浪黯澹鞠華留晚節叢殘蘆荻散幽香黍離
行邁王風降迹熄無詩孰補亡

玉并字珊瑚太興人蒙古三多側室有香珊瑚館詩藁

詩話珊瑚先世本右族幼失怙恃育於他姓逮侍六
橋諱其姓氏固詰之則慘然曰今爲簞簞復修言家
世耶六橋遂以玉爲之姓事六橋甚謹初不諳六法
及見六橋作花鳥便能撫續學爲詩詞俱敏妙歿年
二十八六橋作玉姬小傳徵時人
題詠樊山有七律八首哀豔獨絕

和夫子讀留侯傳作

早逢黃石公暮訪赤松子人比魯連豪伍無樊噲恥英雄
富貴總成空辟穀宜從進履始少年便學長不死永保貌
如婦人美

自題梅花綠端硯

人住綠梅簃

夫子齋名

眉比梅花綠不用畫雙蛾寫鴛鴦卅六

紅樹水仙畫幅并題

矗矗懸崖淺淺灘碧藤紅葉翳清寒一雙龍縞綾波鞵來
往蓬瀛不躡鸞

太平花

天祿識餘云花出劍南宋天聖中獻至京賜名今宮中亦有一株由東陵移植者

粉團黏住舊繁華
本穴徵祥竟共誇
三十六宮春自好
年年開落太平花

北海

坐待銀蟾月來從玉蜺橋
名山呼萬歲勝地踵三朝
雲樹簾舒卷風荷扇動搖
液池無弋釣鵜鶘最逍遙

夫子未歸詩以催之

妾初入世主封侯
仍渡遼東老未休
秋柳甚於春柳綠
凝妝怕上陌邊樓

晚晴簃詩匯卷一百九十二終